



МОНГОЛ УЛСЫН
БОЛОВСРОЛ, ШИНЖЛЭХ УХААНЫ
САЙДЫН ТУШААЛ

2021 оны 01 сарын 18 өдөр

Дугаар А/11

Улаанбаатар хот

Түр журам батлах тухай

Монгол Улсын Засгийн газрын тухай хуулийн 24 дүгээр зүйлийн 24.2 дахь хэсгийг үндэслэн Коронавируст халдвар /Ковид-19/-ын цар тахлаас урьдчилан сэргийлэх, тэмцэх, нийгэм эдийн засагт үзүүлэх сөрөг нөлөөллийг бууруулах тухай хуулийн 7 дугаар зүйлийн 7.1.8, 7.1.9 дэх заалтыг тус тус хэрэгжүүлэх зорилгоор ТУШААХ нь:

1. "Өмчийн хэлбэр харгалзахгүй бүх шатны боловсролын байгууллага суралцагчийн сургалтын төлбөрт хөнгөлөлт үзүүлэх, дараагийн төлбөрт шилжүүлэх түр журам"-ыг хавсралтаар баталсугай.
2. Түр журмын хэрэгжилтийг арга зүйн удирдлагаар хангаж ажиллахыг Дээд боловсролын газар /Г.Батнэмэх/, Бага, дунд боловсролын газар /Г.Ням-Очир/, Сургуулийн өмнөх боловсролын газар /Ж.Мягмар/- т тус тус даалгасугай.
3. Түр журмын хэрэгжилтийг зохион байгуулж, багш, ажилтан, суралцагч, оюутанд тодорхой мэдээлэл өгч, шуурхай ажиллахыг Аймаг, Нийслэлийн боловсролын газрын дарга, өмчийн хэлбэр харгалзахгүй бүх шатны боловсролын байгууллагын захирал, эрхлэгч нарт тус тус үүрэг болгосугай.
4. Их, дээд сургууль, коллежийн хоёрдугаар улирлын хичээл сонголт баталгаажуулахад оюутнаас урьдчилан төлбөр төлөх шаардлага тавихгүй байх зохицуулалт хийхийг их, дээд сургууль, коллежийн захирал нарт даалгасугай.
5. Теле, цахим сургалтын агуулга, чанарт тогтмол үнэлгээ хийн, тасралтгүй сайжруулалт хийж ажиллахыг Боловсролын хүрээлэн /П.Лхагвасүрэн/-д үүрэг болгосугай.
6. Багш нарын чадварыг сайжруулах, дэмжих, цахим хичээл бэлтгэх, заах орчин нөхцөлийг бүрдүүлэх арга хэмжээ авч ажиллахыг бүх шатны боловсролын байгууллагын захирал, эрхлэгч нарт үүрэг болгосугай.

САЙД



Л.ЦЭДЭВСҮРЭН

142110048

Боловсрол, шинжлэх ухааны сайдын
2021 оны 01 дүгээр сарын 18 -ны
өдрийн 11/11 тоот тушаалын хавсралт



**ӨМЧИЙН ХЭЛБЭР ХАРГАЛЗАХГҮЙ БҮХ ШАТНЫ БОЛОВСРОЛЫН СУРГАЛТЫН
БАЙГУУЛЛАГА СУРАЛЦАГЧИЙН СУРГАЛТЫН ТӨЛБӨРТ ХӨНГӨЛӨЛТ ҮЗҮҮЛЭХ,
ДАРААГИЙН ТӨЛБӨРТ ШИЛЖҮҮЛЭХ ТҮР ЖУРАМ**

Нэг. Ерөнхий зүйл

1.1. Энэхүү түр журмаар Коронавируст халдвар /Ковид-19/-ын цар тахлаас урьдчилан сэргийлэх, тэмцэх, нийгэм эдийн засагт үзүүлэх сөрөг нөлөөллийг бууруулах тухай хууль хэрэгжих хугацаанд өмчийн хэлбэр харгалзахгүй бүх шатны боловсролын сургалтын байгууллага нь суралцагчийн сургалтын төлбөрт хөнгөлөлт үзүүлэх, дараагийн төлбөрт шилжүүлэхтэй холбоотой харилцааг зохицуулна.

1.2. Түр журмын зорилго нь суралцагчийн тасралтгүй, чанартай боловсрол эзэмших нөхцөл боломжийг бүрдүүлэх, цахим сургалтын чанар, хүртээмжийг сайжруулахад оршино.

1.3. Сургалтын төлбөрийн хөнгөлөлт эдлэх, дараагийн улиралд шилжүүлэн тооцох талаар цэцэрлэг, сургуулийн дотоодод мөрддөг баримт бичигт тусган, суралцагчийн эцэг, эх, асран хамгаалагч /цаашид эцэг эх гэх/, оюутантай зөвшилцөж, тэдэнтэй байгуулсан гэрээгээр баталгаажуулна.

1.4. Төлбөртэй үйл ажиллагаа явуулдаг цэцэрлэг, сургууль нь сургалтын төлбөрийн бүтэц, бүрдүүлэлт, зарцуулалтын талаар эцэг, эх, оюутанд мэдээлэл өгч хэвших үүрэг хүлээнэ.

Хоёр. Сургалтын төлбөрийг хөнгөлөх

2.1. Сургуулийн өмнөх боловсролын байгууллага дараах зохицуулалт хийнэ:

2.1.1. Төлбөртэй үйл ажиллагаа явуулдаг цэцэрлэг нь төлбөрийг эцэг, эхийн санхүүгийн нөхцөл боломжид суурилан уян хатан нөхцөлөөр сар, улирлаар тооцон авах;

2.1.2. Эцэг, эхтэй төлбөрийн хөнгөлөлтийн хэлбэрүүдийг ярилцан, тэдний хөдөлмөр эрхлэлт, орлогын байдлыг харгалзан зөвшилцөж, тодорхой хөнгөлөлт үзүүлэх;

2.1.3 Үргэлжлүүлэн цэцэрлэгт хүүхдээ явуулах боломжгүй болсон эцэг, эхэд төлсөн төлбөрийн үлдэгдэл хэсгийг буцаан олгох.

2.2. Ерөнхий боловсролын байгууллага дараах зохицуулалт хийнэ:

2.2.1. Төлбөртэй үйл ажиллагаа явуулдаг ерөнхий боловсролын сургууль нь сургалтын төлбөрийг эцэг, эхийн санхүүгийн нөхцөл боломжид суурилан, уян хатан нөхцөлөөр сар, улирлаар тооцон авах;

2.2.2. Төле хичээлээс гадна суралцагчид цахим хичээл, давтлага өгсөн тохиолдолд түүнд зарцуулагдсан зардлын тооцоо нь төлбөртэй хэрхэн уялддаг талаар эцэг, эхэд мэдээлж, дээрх зорилгоор дахин нэмэлт төлбөр авахгүй байх;

2.2.3. Эцэг, эхтэй төлбөрийн хөнгөлөлтийн хэлбэрүүдийг ярилцан, тэдний хөдөлмөр эрхлэлт, орлогын байдлыг харгалзан зөвшилцөж, тодорхой хөнгөлөлт үзүүлэх;

2.2.4. Үргэлжлүүлэн сургуульд хүүхдээ явуулах боломжгүй болсон эцэг, эхэд төлсөн сургалтын төлбөрийн үлдэгдэл хэсгийг буцаан олгох.

2.3. Дээд боловсролын байгууллага дараах зохицуулалт хийнэ:

2.3.1. Төлбөртэй үйл ажиллагаа явуулдаг их, дээд сургууль, коллеж нь сургалтын төлбөрийг оюутны гэр бүлийн санхүүгийн боломжид суурилан уян хатан нөхцөлөөр хэсэгчлэн, хугацаа тохиролцон авах;

2.3.2. Оюутны цахим хичээлд хамрагдсан ирц, идэвх, чадвар, явцын дүн зэргийг харгалзан олон төрөлт хэлбэрээр сургалтын төлбөрийн хөнгөлөлт үзүүлэх;

2.3.3 Оюутанд нэрэмжит тэтгэлэг, сургалтын тэтгэлэг, тусламж олгох асуудлыг сургуульд мөрддөг холбогдох журмын дагуу нэмэгдүүлэх, идэвхжүүлэх;

2.3.4 Сургуулийн дотуур байранд амьдардаг оюутны байрны зардлын зөрүү болон илүү төлөлтийг оюутантай тохиролцон буцаан олгох, өөр төлбөрт шилжүүлэх, эсхүл дараагийн улирлын төлбөрт шилжүүлэн тооцох.

Гурав. Сургалтын төлбөрийг дараагийн улиралд шилжүүлэх

3.1. Тухайн улиралд хүндэтгэх шалтгаанаар судалж чадаагүй хөтөлбөр, хичээлийг оюутны хүсэлтээр цуцлан, дараагийн улиралд судлах боломж олгон төлбөрийг шилжүүлнэ.

3.2. Суралцагч, оюутан нь цахим хичээлийн чанар, хүртээмжийн хангалтгүй байдлаас хамаарч хичээл, хөтөлбөрийг дахин нэмэлтээр судлах хүсэлт гаргасан тохиолдолд үндэслэлийг судлан, тухайн хичээлээр дахин төлбөр авахгүй байх, тодорхой төлбөрийг шилжүүлэх арга хэмжээ авна.